

Compania mester bay pone su cartanan riba mesa awor

Coastal mester identifica su mes y su partnernan

Preguntanan sin contesta entorno ta bolbe haya hopi atencion

ORANJESTAD(AAN)--

Enfrente e tension internacional pa sucesonan entorno Kuwait y Irak y teniendo cuenta cu publicacionnan recientemente na Merca, na Aruba preguntanan sin contesta enfrente e refineria Coastal ta bolbe haya hopi atencion. Mas y mas e opinion cu Coastal mester identifica su mes y su partnernan ta keda presenta na DIARIO.

"Masha bunita pa bisa cu nos tin un refineria, cu a scapa basta placa dor di bini Aruba, caminda segun e Presidente di Coastal mes, e oportunidadnan pa gana placa, ta mucho mas grandi cu na Merca. Aruba no ta beneficia di Coastal manera el a beneficia di Lago, pero hecho ta, cu Aruba por haya su mes den problema si."

Esaki ta un di e opinionnan cu a keda presenta di personanan, cu a bisa cu a bira tempo pa Aruba sa kende y kico el a permiti drenta den su cas y a regala tur loke el a regala pa asina huma por sali for di pipa di refineria atrobe. "Lubida sentimentalismo. Lubida e forma cu por traha ariba emocion ora cierto sonidonan resona atrobe na San Nicolas y huma sali for di pipanan. Nos mester mira e realidad," a worde indica.

Te awor e asunto di refineria a worde trata a base di basta emocion, cu a worde utiliza den

arena politico tambe. Pero na mes momento te ainda Gobierno no kier realiza, cu Aruba no sa mucho di Coastal, cu no a contesta preguntanan importante.

A worde muestra cu e guerra cu ta amenaza na Medio Oriente tin su raiz den mundo di petroleo. E sancionnan, tuma pa Nacionnan Uni, ta preta Irak pa bandona e pais, cu el a invadi, kier meen Kuwait, otro productor importante di crudo. Pesey Aruba mester mira bon ta kende y kico ta Coastal si awe of mañan Aruba no kier haya su mes den sorpresa.

"Gobierno a entrega na Coastal. Tur loke gobernantenan tabata tin na vista ta pa den eleccion nan por bisa cu nan a bolbe habri e refineria. A costo di kico?" Preocupacion ta sali dilanti cerca informantenan, cu a bisa cu aña pasa ya Coastal a demostra cu loke revistanan internacional ta skirbi di e compania tin su berdad. Con ta atende cu hende, a keda demostra den e forma cu Coastal a atende cu Turconan pa no papia mes di e trahadornan Arubano.

Si den e casonan aki a trapa ariba un grupo di trahador, awor tin peligro mas grandi na vista. Kende ta e socionan di Coastal y cu cual pais e compania ta haci negoshi?

Na momento cu Coastal a presenta su mes aña pasa na

Aruba, a keda demostra cu China Comunista ta un partner di negoshi di Coastal. Un realidad, cu a worde bagateliza pa Gobierno y miembronan di Parlamento, cu ta sostene Gobierno. Despues publicacionnan, basa ariba berdad, a muestra cu Coastal a yega di haci negoshi cu Gaddafi di Libia, contra sancionnan Mericano y hasta tabata socio cu Libia den un refineria na Alemania.

Nunca e berdadnan aki por a worde refuta y e hecho cu awor e revista renombra Financial World ta yama e Presidente di Coastal, Wyatt, e homber di petroleo di Saddam Hussein di Irak, Aruba mester bolbe tene su curazon.

Mientras te awe informacionnan di exterior semper a papia di Oscar Wyatt como un comerciante astuto, cu a sa di crea un fortuna rapidamente y e nomber di Coastal hopi biaha a sali den articulonan negativo, a yega e momento, segun informantenan, pa Coastal hunga carta abierta. Aruba tin tur derecho di sa kende ta negoshi cu Coastal, kende ta Coastal y kico ta Coastal.

Si awe of mañan e conflicto na Medio Oriente escala, Aruba por haya su mes den un situacion sumamente penoso pa presencia di Coastal, si e compania aki en berdad tin lazonan cu cierto paisnan. E ora no ta Wyatt, ni

Coastal, ni e Gobierno cu a regala Coastal tur loke por a regala, ta haya nan mes den problema, pero ta henter Aruba

lo mester sinta warda kico esey lo por significa y Aruba por haya su mes den problemanan sumamente serio.

STA.THERESIA SCHOOL 58 AÑA MAÑAN

Den e segundo articulo aki riba Iglesia Santa Theresita na San Nicolas cu ta celebra 60 aña di existencia dia 9 di februari, por enfatiza un biaha mas e necesidad grandi financiero, di mas di mey millon florin cu ta necesario pa drecha e misa aki. Ta ser spera cu pa medio di actividadnan comunidad di San Nicolas y di Aruba lo por yuda pa trata di logra mas tanto posibel e aña aki pa e trabaonan di urgencia por ser haci.

E problema cu tabata tin cu e iglesia aki na principio tabata cu no tabata tin pader pa e parroquia di San Nicolas y mester a encarga Pastoor Hendriks cu e parroquia.

E tabata encarga cu misa di Savaneta y esun di San Nicolas. Dos biaha pa siman e tabata haci misa na San Nicolas. Un biaha na Papiamento y un biaha tabata na ingles.

SCHOOL CATOLICO PA SAN NICOLAS

Dia 9 di Februari 1931 autonomia di Parroquia di San Nicolas a bira un hecho cu nombramento di Pastoor Hendriks como pastoor di San Nicolas.

Tabata falta di un school catolico na San Nicolas y un comision a wordo forma bao presidencia di Sr.Baldomero Bislick pa construi un school y dia 16 di september 1932 a cuminsa construi Sta. Theresia School, cu entre misa y school un cas pa soeurnan.

Dia 9 di Januari 1933 e school a habri su portanan. Esaki kiermeen cu mañan e ta cumpli 58 aña di existencia.

Soeur Philotea a bira prome cabesante.

Tabata tin tres soeur dominicano cu a traha na e school e tempo ey y tambe juffrouw Lucy Marten den vierde klas y juffrouw Nicomeda Thijssen como kwekeling.


Na 1935 juffrouw Bets de Kort a bira maestra aki y a ser trasladada for di Savaneta.

Pastoor Hendriks a fallece na 1942 y e caya cu tabata Ceintuurbaan, a cambia di nomber y bira Pastoor Hendriksstraat como gratitud di pueblo di San Nicolas pa su labornan pa e parroquia.

E di dos pastoor a bira Th.Exler y el a bin ripara cu Pastoor Hendriks a biba den un sobriedad di mas grandi cu por tin.

El a haya su mes ta encarga cashinan pa buki, tapijt, coppie cu scotter, glas, cuadronan.

Pastoor Exler a preocupa hopi pa navegantenan y den un cas di palo dilanti misa, el a funda Zeemanshuis na 1934.



MISA Y ZEEMANSHUIS NA 1936

Ora cu e aña siguiente a construi e misa mas grandi, palonan di e misa a wordo usa pa expande Zeemanshuis (awe Teresita Center).

Den e mes tempo a cuminsa construi muraya pa santana catolico y na october 1934 a cuminsa dera morto aki.

Den otro articulo ta skirbi di Cicilia Club, Frerenan De La Salle y otro schoolnan y di e chinesnan cu a bira catolico.

Eleccion pa Staten ta cerca?

ORANJESTAD (AAN) E ultimo dos lunanan di aña 1990 hopi a ser papia riba un eventual eleccion di Staten na aña 1991.

Miembronan di coalicion no a bay den detayes loque a ser papia, y unicamente algun miembro di coalicion a bisa cu

no tin problema den gobernacion.

Parlamentario Rudy Croes den su declaracion Dialuna na DIARIO, unda e ta lamenta ausencia di A.V.P. den e Tripartite, Rudy a expresa riba proximo eleccion.

Kico a conduci Rudy na expresa; E expresion di Rudy a pone varios hende pensa y te hasta haci pregunta. Parlamentario Rudy Croes a bisa; "Pesey mi kier pa pueblo ta na haltura di e acontecimiento aki, pa den proximo eleccion vota realmente pa su representantenan cu ta traha pa nan interesnan, pasobra pueblo ta paga pa nan traha den parlamento y no como radio rochelista".

Apenas Gabinete Oduber a cumpli 2 aña den gobierno y tin dos aña mas pa bay y como tal e expresion di Rudy a cay poco straño pasobra ta hopi leeuw pa cuminsa cu campaña electoral of cu Rudy ta mira eleccion den porta?



A.C.E. CONSTRUCTION N.V.

Pa un proyecto nobo A.C.E. CONSTRUCTION n.v. tin mester di lo siguiente:

- VERFDO
- LOODGIETER
- CARPINTE FINI
- CARPINTE BRUTO
- METSLA
- ELECTRICIEN
- PEON

Comienzo di e proyecto: mediado di Januari 1991

Solicita solamente via Job Center, den Biblioteca Publica, G. Madurostraat 13.